


2002-08-28
kioskoa

Iban Arregi

«Demokrazia»ren izenean

Garzonen (orain arteko) azkena eta gero, eta dagoeneko oso gauza gutxi *harritzen* bagaitu ere, bitxia behintzat bada Espainiako Gobernutik gertuen dauden egunkariak «demokrazia» hitza zenbat eta nola erabili zuten atzo. «Demokraziak zigilua jarri dio Batasunari», zioen atzoko **El Mundo**-ren editorialaren titularrak. Hala, «Espainiako demokraziak egun historikoa» izan zuela zioen egunkari horrek.

Abc ere berdintsu aritu zen atzoko editorialean, eta «Batasuna demokraziatik bidali» izana azpimarratu zuen. Egunkari horrek, bestalde, EAri eta EAJri «oinarri demokratikoei» bizkar eman izana leporatu zien. Eta aurrekoen bide beretik, **La Razón** egunkariak ere Batasuna lege kanpo uzteko «demokraziaren zilegitasuna» nabarmendu zuen. «Demokrazia» horren izenean, gainera, iritzi askatasuna ere kasik zalantzan jarri zuen egunkari horrek: «CiUk haren historia demokratikoa zikindu du, ezohiko abstentzio baten ondoren». Demokrazia beren erara ulertzen eta zabaltzen dutelako, atzoko editorialean **Deia**-k gogorarazten zuenez: «Madrilek ez du inoiz kontuan hartu Eusko Legebiltzarrak hartutako erabakirik. Batzuentzat, gehiengoak soilik haiena denean balio du, hori da haien demokraziaren kontzeptua». «Demokrazia» hitza hitzetik hortzera erabili zuten atzo **El Mundo**, **Abc**, **La Razón** eta beste egunkari batzuek, bai. Mexikoko **La Jornada** egunkariak ere, atzoko editorialean, «demokrazia» hitza erabili zuen, baina oso bestelako zentzuan: «Espainia: demokrazia turkiar erara», zioen atzo **La Jornada**-k. Demokrazia ulertzeko beste era bat, alegia.



udamina

Pako Aristi

‘Orden de guerra’

Atxiloketa giroa dabil udazkena aurreratuta datorren Euskal Herri honetan, eguraldiari hain lotua baitihoa gure bizitza; orain badirudi eguraldiak egin nahi duela bat gurekin, laino beltz, haize hotz eta euri-jasa bortitzen eszenarioa ipiniz gainera datozkigun gertaerei.

Garzonen argazki bati begira nago, *Gara*-n. Lehenxeago, kioskora jaitsi naizenean, bere argazkia ikusi dut *Interviu*-n: Bakearen Nobel sarirako bultzatu nahi dute. Harrigarria da gure mundua; edo hobeto esanda, biziartzen diguten mundua, guk ez baigenuen hau nahi. Baina ez dugu ahalmenik guk nahi dugunekin eta nahi dugun bezala bizitzeko. *Garako* aurreko orrian Otegiren argazkia ikusi dut: ahotsik gabe utzi nahi duten gizonak hemezortzi tresna dauzka ahoaren aurrean, mikrofono eta grabagailuen artean. Hemezortzi kazetari biktima nola sentitzen den jakin nahian. Laster hemezortzi fusil izango ditu apuntatzen, hemezortzi barrote, baina milaka gutun, milaka bisita.

Orri berean Iruñeako argazki bat: polizia espainola borra handiak hartuta etxe batean sartzera doa. Ateak txikitzen doaz, festa amaitu dela iragartzera. Irudiok Naziek Alemanian egin zituztenak dakartzkide gogora. Gorputzaldi txarra uzten didate. Aitortu behar dut Batasunaren ilegalizazioa, hasiera batean, gauza tekniko eta juridiko bat bezala ikusi nuela. Gero asko gustatu zait Batasunako buruzagiek agertu duten kuraia, bide alternatiboak planteatzeko argitasuna, erasora jaurti dizkieten tresna juridiko, polizial, politiko eta komunikatibo guztien aurreko adorea, burua ez galtzea; miresgarria Otegi agertzen ari den tenplea. Azken albisteek bihotz barruraino sartu didate auzia.

Liburu bat jaso dut egunotan, Euskerazaintzak argitaratua. Gerra zibilean euskal idazle gazteek sufrututakoak kontatzen ditu. Oso polita da. Hona Txomin Jaka Kortajarenak faxista batekin izandako elkarrizketa:

«¿Usted ha sido un fanático fomentador del vascuence en esta zona?»

«He procurado que hablen su lengua materna, el euskera, usando el derecho natural»

«¿En adelante aquí ninguna otra lengua tiene derecho para hablar fuera del castellano!»

«¡Señor! ¿Es una orden de guerra?»

«Así es. ¡Es orden de guerra!»

«Entonces trataré de cumplirla»

Gaurko garaia gogorarazten dizkit.

hizpideak

Egun patetiko baten kronika

Legea derrigorrez bete behar zuelako jardun al zuen, jardun zuen bezala, atzo Ertzaintzak Araba, Gipuzkoa eta Bizkaiko Batasuneko egoitzak ixteko orduan? Hori da atzoko irudiak ikusita euskaldun abertzale askok bere buruari egingo zion galdera. Nola jardungo ote du orduan Eusko Jaurlaritzaren agindupean diharduen gorputz polizial horrek legeak gogoz betetzen eta beteazten dituenen?

Izan ere, afera honetan Eusko Jaurlaritzak hartu duen protagonismoa baita

eztabaida gune nagusietako bat. Berez, protagonismo hori Espainiako Gobernuarena eta harekin gertutik lan egiten duen justiziarena zen prozesuaren hasieran. Baina, zergatik ote? Jaurlaritzak protagonismo osoa kendu (nahi izan) dio Espainiako Gobernuari, atzo Gasteiz, Bilbo eta Donostiako irudietan ikusi zen bezala.


Atzoko irudiek erakusten dute zenbateraino ari den Eusko Jaurlaritzak Madrildik datozkion aginduak betetzen; zenbateraino den ahula Eusko Jaurlaritzak Madrilgo agindu bati aurre egiteko duen nahia eta ahalmena. Nota ona jarriko diote Espainiako Gobernuak eta komunikabideek Jaurlaritzari, atzokoan erakutsitako kartsutasunaga-

tik; oso bestelakoa izango da, segur aski, ordea, Euskal Herriko herritarrek jarriko diotena.

Nekatu gabe errepikatzen du Jaurlaritzak, berak egindako inkesten arabera, Batasuneko kide gehienak ETArek borroka armatuaren aurkakoak direla. Jakingo al dugu inoiz zer iritzi duten Jaurlaritzan dauden alderdietako kideek Jaurlaritzak Madrildik iristen zaizkion aginduak horren era itsuan betetzeko jokabideaz?

Espainiako Alderdien legeak bakea urrutzen duela esan zuen atzo Jaurlaritzak. Hala izango da, baina gutxi jarriko dute dudatan atzo erakutsitako jokabideak abertzaleen elkarlana ere urrundu egiten duela.

hemeroteka



«Legez kanporatzea baino lehen». «Legez kanporatu eta gero».

euskaldunon 3.640. zenbakia
Egunkaria

Ohorezko Lehendakaria: Martin Ugalde

Administrazio Kontseiluko Lehendakaria: Joan Mari Torrealdai

Kontseilari Ordezkarria: Inaki Uribe

Zuzendaria: Martxelo Otamendi

Gerentea: Mikel Sorozabal

Publizitatea: Idoia Sanz

Egoitza Nagusia: Martin Ugalde Kultur Parkea, 20140 Andoain Tel.: 943300222
Erredakzioko faxa: 943300255-943590354 Publizitateko faxa: 943300707

Webgunea: www.egunkaria.com

Posta elektronikoa: egunkaria@egunkaria.com

Publizitatea: publi@egunkaria.com

Batzorde Parekidea: 72564 E Lege Gordailua: SS 800/90 ISSN 1134-640X
OJDK IKUSKATURIKO HEDAPENA

ORDEZKARITZAK ■ Araba: San Antonio, 20-1 ezker. 01005 Gasteiz
Tel.: 945233872 Faxa: 945233873 Publizitatea: Tel.: 945131965

Nafarroa: Irabie Monasterioa, 45-13 esk. (Irritzi dorrea) 31011 Iruñea
Tel.: 948178078-79 Faxa: 948178077 Tel.: Publizitatea: 948176686

Bizkaia: Egia Jenerala, 3-behea. 48010 Bilbo Tel.: 944104046 Faxa: 944103715
Tel.: Publizitate Orokorra: 944701199-80 Publizitate Lokala: 944701114

Lapurd, Nafarroa Beherea, Zuberoa: Pelletier 35, 1 503 Posta
kubxatila, 64100 Baiona Tel.: 559593575 Faxa: 559257511